

# ॥ तैत्तिरीय संहिता ॥

## ॥चतुर्थः प्रश्नः॥

### ॥तैत्तिरीयसंहितायां प्रथमकाण्डे चतुर्थः प्रश्नः॥

आ ददे॑ ग्रावा॑स्यध्वर॑कृद् दे॒वेभ्यो॑ गम्भीर॑मिमम॑ध्वरं कृ॒ध्युत्त॑मेन॑  
प॒विनेन्द्रा॑य॒ सोम॑ꣳ सुषु॑तं मधु॑मन्तं प॒र्यस्व॑न्तं वृष्टि॑वनि॒मिन्द्रा॑य  
त्वा वृ॒त्रघ्न॑ इन्द्रा॑य त्वा वृ॒त्रतुर॑ इन्द्रा॑य त्वाऽभि॑माति॒घ्न इन्द्रा॑य  
त्वाऽऽदि॑त्यव॒त इन्द्रा॑य त्वा वि॒श्वदै॑व्याव॒ते श्वा॒त्राः स्थं॑ वृ॒त्रतुरो॑  
राधो॑गूर्ता अ॒मृत॑स्य॒ पत्नी॑स्ता दे॒वीर्दे॒वत्रे॑मं य॒ज्ञं ध॒त्तोप॑हूताः सोम॑स्य  
पिब॑तोप॑हूतो युष्माक॑ꣳ (१)

सोमः॑ पिब॑तु यत्ते॑ सोम दि॒वि ज्योति॑र्यत् पृथि॒व्यां  
यदुरा॑व॒न्तरि॑क्षे तेना॒स्मै यज॑माना॒योरु रा॒या कृ॒ध्यधि॑ दा॒त्रे वो॑चो  
धिष॑णे वी॒डू स॒ती वी॑डयेथा॒मूर्जं द॑धाथा॒मूर्जं मे ध॑त्तं मा वाꣳ  
हिꣳसिषं॑ मा मां हिꣳसिष्टं॑ प्रा॒गपा॑गुद॒गध॑राक्तास्त्वा दि॒श आ  
धा॑व॒न्त्वम्ब॑ नि ष्व॑र। यत्ते॑ सो॒मादा॑भ्यं॒ नाम॒ जागृ॑वि॒ तस्मै॑ ते सोम॑  
सोमा॑य॒ स्वाहा॑॥ (२)

युष्माकꣳ स्वर॑ यत्ते॑ नवं च॥ [१]

वा॒चस्प॑तये॒ पव॑स्व वाजि॑न् वृषा॒ वृष्णो॑ अꣳशु॒भ्यां ग॑भ॒स्तिपू॑तो  
दे॒वो दे॒वानां॑ प॒वित्र॑मसि॒ येषां॑ भा॒गोऽसि॑ तेभ्य॑स्त्वा॒ स्वां कृ॑तोऽसि॒  
मधु॑मती॒र्न इष॑स्कृ॒धि वि॒श्वेभ्य॑स्त्वेन्द्रि॒येभ्यो॑ दि॒व्येभ्यः॑ पा॒र्थिवे॑भ्यो  
मन॑स्त्वाष्टृ॒र्वन्तरि॑क्षमन्वि॒हि स्वाहा॑ त्वा सु॒भवः॒ सूर्या॑य दे॒वेभ्य॑स्त्वा

मरीचिपेभ्य॑ ए॒ष ते॒ योनिः॑ प्रा॒णाय॑ त्वा॥ (३)

वाचः सप्तचत्वारिंशत्॥ [२]

उ॒प॒या॒म॒गृ॒ही॒तोऽस्य॑न्तर्यच्छ॒ म॒घव॑न् पा॒हि सोम॑मुरुष्य॒ रायः॑  
स॒मिषो॑ यज॒स्वान्तस्ते॑ दधामि॒ द्यावा॑पृथि॒वी अ॒न्तरु॑र्वन्तरि॒क्षं  
स॒जोषा॑ दे॒वैरव॑रैः परै॑श्चान्तर्या॒मे म॑घवन् मादयस्व॒ स्वां कृ॑तोऽसि  
म॒धु॒मती॑र्न॒ इष॑स्कृ॒धि वि॒श्वेभ्य॑स्त्वेन्द्रि॒येभ्यो॑ दि॒व्येभ्यः॑ पा॒र्थि॒वेभ्यो॑  
मन॑स्त्वाष्ट्रुर्वन्तरि॒क्षम॑न्विहि॒ स्वाहा॑ त्वा सु॒भवः॑ सू॒र्याय॑ दे॒वेभ्य॑स्त्वा  
मरीचिपेभ्य॑ ए॒ष ते॒ योनि॑रपा॒नाय॑ त्वा॥ (४)

दे॒वेभ्यः॑ सप्त च॥ [३]

आ वा॑यो भूष शुचिपा॒ उप॑ नः सु॒हस्रं॑ ते नि॒युतो॑ वि॒श्ववा॑र।  
उपो॑ ते अ॒न्धो म॒द्यम॑यामि॒ यस्य॑ दे॒व दधि॑षे पू॒र्वपे॑यम्॥  
उ॒प॒या॒म॒गृ॒ही॒तोऽसि॑ वा॒यवे॑ त्वेन्द्र॒वायू॑ इ॒मे सु॒ताः। उप॑ प्रयो॒भिरा॑  
ग॒त॒मिन्द्र॑वो वामु॒शन्ति॑ हि॥ उ॒प॒या॒म॒गृ॒ही॒तोऽसीन्द्र॑वा॒युभ्यां॑ त्वैष ते॒  
योनिः॑ स॒जोषा॑भ्यां त्वा॥ (५)

आ वा॑यो त्रिचत्वारिंशत्॥ [४]

अ॒यं वा॑ मि॒त्रावरु॑णा सु॒तः सोम॑ं ऋ॒तावृ॑धा। ममे॒दिह॑ श्रु॒तं  
हव॑म्। उ॒प॒या॒म॒गृ॒ही॒तोऽसि॑ मि॒त्रावरु॑णाभ्यां त्वैष ते॒ योनि॑र् ऋ॒तायु॑-  
भ्यां॑ त्वा॥ (६)

अयं वाँ विश्वः॥ [५]

या वाँ कशा मधुमत्यश्विना सूनृतावती। तया यज्ञं मिमिक्षतम्।  
उपयामगृहीतोऽस्यश्विभ्याँ त्वैष ते योनिर्माध्वीभ्याँ त्वा॥ (७)

या वामृष्टादश॥ [६]

प्रातर्युजौ वि मुच्येथामश्विनावेह गच्छतम्। अस्य सोमस्य  
पीतये॥ उपयामगृहीतोऽस्यश्विभ्याँ त्वैष ते योनिर्ऋषिभ्याँ त्वा॥ (८)

प्रातर्युजावेकान्नविंशतिः॥ [७]

अयं वेनश्चोदयत् पृथिजगर्भा ज्योतिर्जरायू रजसो विमाने।  
इममपां सङ्गमे सूर्यस्य शिशुं न विप्रा मतिभीं रिहन्ति॥  
उपयामगृहीतोऽसि शण्डाय त्वैष ते योनिर्वीरताँ पाहि॥ (९)

अयं वेनः पञ्चविंशतिः॥ [८]

तं प्रत्नथाँ पूर्वथाँ विश्वथेमथाँ ज्येष्ठताँतिं बर्हिषदं सुवर्विदं  
प्रतीचीनं वृजनं दोहसे गिराऽऽशुं जयन्तमनु यासु वर्धसे।  
उपयामगृहीतोऽसि मर्काय त्वैष ते योनिः प्रजाः पाहि॥ (१०)

तं षड्विंशतिः॥ [९]

ये देवा दिव्येकादश स्थ पृथिव्यामध्येकादश स्थाऽप्सुषदो  
महिनैकादश स्थ ते देवा यज्ञमिमं जुषध्वमुपयामगृहीतो-

ऽस्याग्रयणोऽसि स्वाग्रयणो जिन्वं यज्ञं जिन्वं यज्ञपतिमभि  
सर्वना पाहि विष्णुस्त्वां पातु विशं त्वं पाहीन्द्रियेणैष ते  
योनिर्विश्वेभ्यस्त्वा देवेभ्यः॥ (११)

ये देवास्त्रिचत्वारिंशत्॥ [१०]

त्रिंशत्रयश्च गणिनो रुजन्तो दिवः रुद्राः पृथिवीं च सचन्ते।  
एकादशासौ अप्सुषदः सुतः सोमं जुषन्ताः सर्वनाय विश्वे॥  
उपयामगृहीतोऽस्याग्रयणोऽसि स्वाग्रयणो जिन्वं यज्ञं जिन्वं  
यज्ञपतिमभि सर्वना पाहि विष्णुस्त्वां पातु विशं त्वं पाहीन्द्रियेणैष  
ते योनिर्विश्वेभ्यस्त्वा देवेभ्यः॥ (१२)

त्रिंशद् द्विचत्वारिंशत्॥ [११]

उपयामगृहीतोऽसीन्द्राय त्वा बृहद्वते वयस्वत उक्थायुवे  
यत् तं इन्द्र बृहद्वयस्तस्मै त्वा विष्णावे त्वेष ते योनिरिन्द्राय  
त्वोक्थायुवे॥ (१३)

उपयामगृहीतो द्वाविंशतिः॥ [१२]

मूर्धानं दिवो अरतिं पृथिव्या वैश्वानरमृताय जातमग्निम्।  
कविः सम्राजमतिथिं जनानामासन्ना पात्रं जनयन्त देवाः॥  
उपयामगृहीतोऽस्यग्रये त्वा वैश्वानराय ध्रुवोऽसि ध्रुवक्षितिर्ध्रुवाणां  
ध्रुवतमोऽच्युतानामच्युतक्षित्तम एष ते योनिरग्रये त्वा

वैश्वानराय॥ (१४)

मूर्धानं पञ्चत्रिंशत्॥ [१३]

मधुश्च माधवश्च शुक्रश्च शुचिश्च नभश्च नभस्यश्चेषश्चोर्जश्च  
सहश्च सहस्यश्च तपश्च तपस्यश्चोपयामगृहीतोऽसि स॒सर्पो-  
ऽस्य॑हस्पत्याय॑ त्वा॥ (१५)

मधुस्त्रिंशत्॥ [१४]

इन्द्राग्नी॑ आ गंत॑ सुतं गी॒र्भिर्नभो॑ वरेण्यम्। अस्य॑ पातं  
धिये॑षिता॥ उप॒याम॑गृहीतोऽसीन्द्रा॒ग्निभ्यां॑ त्वैष ते॒ योनि॑रिन्द्रा॒ग्नि-  
भ्यां॑ त्वा॥ (१६)

इन्द्राग्नी विंशतिः॥ [१५]

ओमांसश्च॑र्षणीधृतो॒ विश्वे॑ देवासु॒ आ गंत॑। दाश्वा॑सौ  
दाशुषः॑ सुतम्॥ उप॒याम॑गृहीतोऽसि॒ विश्वे॑भ्यस्त्वा दे॒वेभ्य॑ एष ते॒  
योनि॑र्विश्वे॑भ्यस्त्वा दे॒वेभ्यः॑॥ (१७)

इन्द्राग्नी ओमांसो विंशतिर्विंशतिः॥ [१६]

म॒रुत्वंतं॑ वृष॒भं वा॑वृधा॒नमक॑वारिं दि॒व्यं शा॒समिन्द्र॑म्।  
वि॒श्वासा॑हमव॑से नूत॑नायो॒ग्रं स॑हो॒दामि॑ह तं हु॒वेम॑॥  
उप॒याम॑गृहीतोऽसीन्द्रा॒य त्वा म॒रुत्वंत॑ एष ते॒ योनि॑रिन्द्रा॒य  
त्वा म॒रुत्वंते॑॥ (१८)

मरुत्वन्तु९ षड्विंशतिः॥ [१७]

इन्द्रं मरुत्व इह पाहि सोमं यथा शार्याति अपिबः सुतस्य।  
तव प्रणीती तव शूर शर्मन्ना विवासन्ति कवयः सुयज्ञाः॥  
उपयामगृहीतोऽसीन्द्राय त्वा मरुत्वन्त एष ते योनिरिन्द्राय त्वा  
मरुत्वन्ते॥ (१९)

इन्द्रेकान्नत्रिंशत्॥ [१८]

मरुत्वा९ इन्द्र वृषभो रणाय पिबा सोममनुष्वधं मदाय। आ  
सिञ्चस्व जूठरे मध्वं ऊर्मिं त्वं राजाऽसि प्रदिवः सुतानाम्॥  
उपयामगृहीतोऽसीन्द्राय त्वा मरुत्वन्त एष ते योनिरिन्द्राय त्वा  
मरुत्वन्ते॥ (२०)

इन्द्रं मरुत्वो मरुत्वानेकान्न त्रिंशदेकान्न त्रिंशत्॥ [१९]

महा९ इन्द्रो य ओजसा पर्जन्यो वृष्टिमा९ इवा  
स्तोमैर्वथ्सस्य वावृधे॥ उपयामगृहीतोऽसि महेन्द्राय त्वेष ते  
योनिर्महेन्द्राय त्वा॥ (२१)

महानेकान्नविंशतिः॥ [२०]

महा९ इन्द्रो नृवदा चरषणिप्रा उत द्विबर्हा अग्निः  
सहोभिः। अस्मद्रियग्वावृधे वीर्यायोरुः पृथुः सुकृतः कर्तृभिर्भूत्॥  
उपयामगृहीतोऽसि महेन्द्राय त्वेष ते योनिर्महेन्द्राय त्वा॥ (२२)

महानृवत्षड्विंशतिः॥ [२१]

कदा चन स्तरीरसि नेन्द्रं सश्वसि दाशुषै। उपोपेन्नु  
 मघवन् भूय इन्नु ते दानं देवस्य पृच्यते॥ उपयामगृहीतो-  
 ऽस्यादित्येभ्यस्त्वा॥ कदा चन प्र युच्छस्युभे नि पांसि जन्मनी।  
 तुरीयादित्य सवनं त इन्द्रियमा तस्थावमृतं दिवि॥ यज्ञो  
 देवानां प्रत्येति सुममादित्यासो भवता मृडयन्तः। आ वोऽर्वाचीं  
 सुमतिर्ववृत्यादुहोश्चिद्या वरिवोवित्तरासत्॥ विवस्व आदित्यैष  
 ते सोमपीथस्तेन मन्दस्व तेन तृप्य तृप्यास्म ते वयं तर्पयितारो  
 या दिव्या वृष्टिस्तया त्वा श्रीणामि॥ (२३)

वः सप्तविंशतिश्च॥ [२२]

वाममद्य सवितर्वाममु श्वो दिवेदिवे वाममस्मभ्यं सावीः।  
 वामस्य हि क्षयस्य देव भूरैया धिया वामभाजः स्याम॥  
 उपयामगृहीतोऽसि देवाय त्वा सवित्रे॥ (२४)

वामं चतुर्विंशतिः॥ [२३]

अदब्धेभिः सवितः पायुभिर्द्वं शिवेभिर्द्य परि पाहि नो  
 गयम्। हिरण्यजिह्वः सुविताय नव्यसे रक्षा मार्किर्नो अघशंस  
 ईशत॥ उपयामगृहीतोऽसि देवाय त्वा सवित्रे॥ (२५)

अदब्धेभिस्त्रयोविंशतिः॥ [२४]

हिरण्यपाणिमृतये सवितारमुपं ह्वये। स चेत्ता देवता पदम्॥  
 उपयामगृहीतोऽसि देवाय त्वा सवित्रे॥ (२६)



हिरण्यपाणिं चतुर्दश॥ [२५]

सुशर्माऽसि सुप्रतिष्ठानो बृहदुक्षे नमं एष ते योनिर्विश्वेभ्यस्त्वा  
देवेभ्यः॥ (२७)

सुशर्मा द्वादश॥ [२६]

बृहस्पतिसुतस्य त इन्दो इन्द्रियावतः पत्नीवन्तं ग्रहं  
गृह्णाम्यग्ना(३)इ पत्नीवा(३)ः सजूर्देवेन त्वष्ट्रा सोमं पिब  
स्वाहा॥ (२८)

बृहस्पतिसुतस्य पञ्चदश॥ [२७]

हरिरसि हारियोजनो हर्योः स्थाता वज्रस्य भर्ता पृश्नेः प्रेता  
तस्य ते देव सोमेष्टयं जुषः स्तुतस्तोमस्य शस्तोक्थस्य हरिवन्तं  
ग्रहं गृह्णामि हुरीः स्थ हर्योर्धानाः सहसोमा इन्द्राय स्वाहा॥ (२९)

हरिः पञ्चिंशतिः॥ [२८]

अग्र आयूर्ऋषि पवस आ सुवोर्जमिषं च नः। आरे बाधस्व  
दुच्छुनाम्॥ उपयामगृहीतोऽस्यग्रये त्वा तेजस्वत एष ते योनिर्ग्रये  
त्वा तेजस्वते॥ (३०)

अग्र आयूर्ऋषि त्रयोविंशतिः॥ [२९]

उत्तिष्ठन्नोजसा सह पीत्वा शिप्रे अवेपयः। सोममिन्द्र चमू

सुतम्॥ उपयामगृहीतोऽसीन्द्राय त्वौजस्वत एष ते योनिरिन्द्राय  
त्वौजस्वते॥ (३१)

उत्तिष्ठन्नेकविंशतिः॥ [३०]

तरणिर्विश्वदर्शतो ज्योतिष्कृदसि सूर्य। विश्वमा भासि  
रोचनम्॥ उपयामगृहीतोऽसि सूर्याय त्वा भ्राजस्वत एष ते योनिः  
सूर्याय त्वा भ्राजस्वते॥ (३२)

तरणिर्विंशतिः॥ [३१]

आ प्यायस्व मदिन्तम् सोम् विश्वाभिरूतिभिः। भवा नः  
सप्रथस्तमः॥ (३३)

आ प्यायस्व नवम्॥ [३२]

ईयुष्टे ये पूर्वतरामपश्यन् व्युच्छन्तीमुषसं मर्त्यासः।  
अस्माभिरू नु प्रतिचक्ष्याऽभूदो ते यन्ति ये अपरीषु पश्यान्॥ (३४)

ईयुरेकान्नविंशतिः॥ [३३]

ज्योतिष्मतीं त्वा सादयामि ज्योतिष्कृतं त्वा सादयामि  
ज्योतिर्विदं त्वा सादयामि भास्वतीं त्वा सादयामि ज्वलन्तीं  
त्वा सादयामि मल्मलाभवन्तीं त्वा सादयामि दीप्यमानां  
त्वा सादयामि रोचमानां त्वा सादयाम्यजस्रां त्वा सादयामि  
बृहज्योतिषं त्वा सादयामि बोधयन्तीं त्वा सादयामि जाग्रतीं त्वा

सादयामि॥ (३५)

ज्योतिष्मती५ षड्विंशतिः॥ [३४]

प्रयासाय स्वाहाऽऽयासाय स्वाहा वियासाय स्वाहा  
संयासाय स्वाहोद्यासाय स्वाहाऽवयासाय स्वाहा शुचे स्वाहा  
शोकाय स्वाहा तप्यत्वै स्वाहा तपते स्वाहा ब्रह्महत्यायै स्वाहा  
सर्वस्मै स्वाहा॥ (३६)

प्रयासाय चतुर्विंशतिः॥ [३५]

चित्तं५ सन्तानेन भवं यक्रा रुद्रं तनिम्ना पशुपतिं५  
स्थूलहृदयेनाग्निं५ हृदयेन रुद्रं लोहितेन शर्वं मत्स्राभ्यां  
महादेवमन्तःपार्श्वेनौषिष्ठहनं५ शिङ्गीनिकोश्याभ्याम्॥ (३७)

चित्तमष्टादश॥ [३६]

आ तिष्ठ वृत्रहन् रथं युक्ता ते ब्रह्मणा हरीं। अर्वाचीनं५ सु ते  
मनो ग्रावां कृणोतु वग्नुनां॥ उपयामगृहीतोऽसीन्द्राय त्वा षोडशिनं  
एष ते योनिरिन्द्राय त्वा षोडशिनै॥ (३८)

आ तिष्ठ षड्विंशतिः॥ [३७]

इन्द्रमिद्धरीं वहतोऽप्रतिघृष्टशवसमृषीणां च स्तुतीरुपं यज्ञं  
च मानुषाणाम्॥ उपयामगृहीतोऽसीन्द्राय त्वा षोडशिनं एष ते  
योनिरिन्द्राय त्वा षोडशिनै॥ (३९)

इन्द्रमित्रयोर्विशतिः॥ [३८]

असावि सोमं इन्द्र ते शर्विष्ठ धृष्णवा गंहि। आ त्वा  
पृणक्तिन्द्रियं रजः सूर्यं न रश्मिभिः॥ उपयामगृहीतोऽसीन्द्राय  
त्वा षोडशिनं एष ते योनिरिन्द्राय त्वा षोडशिनै॥ (४०)

असावि सप्तविंशतिः॥ [३९]

सर्वस्य प्रतिशीवरी भूमिस्त्वोपस्थ आधित। स्योनाऽस्मै  
सुषदा भव यच्छास्मै शर्म सप्रथाः॥ उपयामगृहीतोऽसीन्द्राय त्वा  
षोडशिनं एष ते योनिरिन्द्राय त्वा षोडशिनै॥ (४१)

सर्वस्य षड्विंशतिः॥ [४०]

महां इन्द्रो वज्रबाहुः षोडशी शर्म यच्छतु। स्वस्ति नो मघवां  
करोतु हन्तु पाप्मानं योऽस्मान् द्वेष्टि॥ उपयामगृहीतोऽसीन्द्राय त्वा  
षोडशिनं एष ते योनिरिन्द्राय त्वा षोडशिनै॥ (४२)

सर्वस्य महान्यषड्विंशतिः षड्विंशतिः॥ [४१]

सजोषा इन्द्र सगणो मरुद्भिः सोमं पिब वृत्रहञ्छूर विद्वान्।  
जहि शत्रूँ रप मृधो नुदस्वाऽथाभयं कृणुहि विश्वतो नः॥  
उपयामगृहीतोऽसीन्द्राय त्वा षोडशिनं एष ते योनिरिन्द्राय त्वा  
षोडशिनै॥ (४३)

सजोषास्त्रिंशत्॥ [४२]

उदु त्यं जा॒तवे॑दसं दे॒वं वह॑न्ति के॒तवः॑। दृ॒शे वि॒श्वाय॑  
सूर्य॑म्॥ चि॒त्रं दे॒वाना॑मु॒दगा॑दनी॒कं चक्षु॑र्मि॒त्रस्य॑ वरु॒णस्या॑ग्रेः।  
आऽप्रा॒द्यावा॑पृथि॒वी अ॒न्तरि॑क्ष॒ः सूर्य॑ आ॒त्मा जग॑तस्त॒स्थुष॑श्च॥  
अग्रे॑ नय॑ सु॒पथा॑ रा॒ये अ॒स्मान् वि॒श्वानि॑ दे॒व व॒युना॑नि वि॒द्वान्।  
युयो॑ध्य॒स्मञ्जु॑हुरा॒णमे॒नो भूयि॑ष्ठां ते नम॑ उ॒क्तिं वि॒धेम॥ दि॒वं गच्छ॑  
सु॒वः प॒त रू॒पेण॑ (४४)

वो रू॒पम॒भ्यैमि॑ वय॑सा॒ वयः॑। तु॒थो वो॑ वि॒श्ववे॑दा॒ वि भ॑जतु  
वर्षि॑ष्ठे अ॒धि ना॑कै॥ ए॒तत् ते॑ अ॒ग्रे राध॑ ऐति॒ सोम॑च्यु॒तं तन्मि॑त्रस्य  
प॒था न॑य॒र्तस्य॑ प॒था प्रे॒तं च॒न्द्रद॑क्षिणा॒ यज्ञ॑स्य॒ प॒था सु॑वि॒ता  
नय॑न्ती॒र्ब्राह्म॑णम॒द्य रा॑ध्यास॒मृषि॑मा॒रुषे॑यं पि॒तृम॑न्तं पै॒तृम॑त्य॒ः  
सु॒धातु॑दक्षिणं॒ वि सु॒वः प॑श्य॒ व्यन्त॑रि॒क्षं य॑त॒स्व स॒दस्यै॑र॒स्मद्वा॑त्रा  
दे॒वत्रा॑ गच्छ॒त म॑धु॒मतीः॑ प्र॒दा॒ता॒र॒मा वि॑श॒तान॑वहा॒या॒स्मान् दे॒व्याने॑न  
प॒थे॒तं सु॒कृता॑ लो॒के सी॑द॒त तन्नः॑ स॒ऽस्कृ॑तम्॥ (४५)

रूपेण॑ सदस्यैरष्टादश च॥ [४३]

धा॒ता रा॒तिः स॑वि॒तेदं जु॑षन्तां प्र॒जाप॑ति॒र्निधि॑पति॒र्नो अ॒ग्निः।  
त्वष्टा॑ वि॒ष्णुः प्र॑जया॒ स॒ररा॑णो यज॑मा॒नाय॑ द्रवि॑णं दधातु॥ स॒मिन्द्र॑  
णो म॑न॒सा ने॒षि गो॒भिः स॒ः सू॒रिभि॑र्म॒घव॑न्त्स॒ऽस्व॒स्त्या। सं ब्र॑ह्म॒णा  
दे॒वकृ॑तं यदस्ति॒ सं दे॒वाना॑ सु॒म॒त्या य॒ज्ञिया॑नाम्॥ सं वर्च॑सा॒  
पय॑सा॒ सं त॒नूभि॑रग॒न्महि॑ म॑न॒सा स॒ः शि॒वेन॑। त्वष्टा॑ नो अ॒त्र

वरिवः कृणो- (४६)

त्वनुं मा॒र्ष्टुं त॒नुवो॒ यद्वि॒लि॒ष्टम्॥ यदद्य॑ त्वां प्रय॒ति य॒ज्ञे  
अ॒स्मिन्न॒ग्ने हो॒ता॒र॒म॒वृ॒णीम॒हीह॑। ऋ॒ध॒ग॒या॒ङ्घ्रि॒गु॒ताश॑मि॒ष्टाः प्र॒जा॒न॒न्  
य॒ज्ञमु॒प॒याहि॑ वि॒द्वान्॥ स्व॒गा वो॑ दे॒वाः स॒दन॑म॒कर्म॑ य आ॒ज॒ग्म  
स॒व॒ने॒दं जु॑षा॒णाः। ज॒क्षि॒वा॒सः प॒पि॒वा॒स॒श्च वि॒श्वेऽस्मे॑ ध॒त्त  
व॒सवो॑ व॒सूनि॑॥ या॒नाऽव॑ह उ॒श॒तो दै॒व दे॒वान्ता॑न् (४७)

प्रेर॑य॒ स्वे अ॒ग्ने स॒ध॒स्थै॑। व॒ह॑मा॒ना भ॑र॒माणा॑ ह॒वी॒षि व॒सुं  
घ॒र्म दि॒व॒मा ति॑ष्ठ॒तानु॑॥ य॒ज्ञं य॒ज्ञं ग॑च्छ॒ य॒ज्ञप॑तिं गच्छ॒ स्वां योनिं॑  
गच्छ॒ स्वा॒हृष॑ ते॒ य॒ज्ञो य॑ज्ञ॒पते॑ स॒हसू॑क्त॒वाकः॑ सु॒वीरः॑ स्वा॒हा दे॒वा  
गा॒तुवि॒दो गा॑तुं वि॒त्वा गा॑तुमि॒त् मन॑स॒स्पत॑ इ॒मं नो॑ दे॒व दे॒वेषु॑  
य॒ज्ञ॒ स्वा॒हा वा॒चि स्वा॒हा वा॒र्ते धाः॑॥ (४८)

कृणोतु॒ तान॒ष्टाच॑त्वारि॒शच्च॑॥ [४४]

उ॒रु॒ व॒ हि रा॒जा व॑रु॒णश्च॒कार॒ सूर्या॑य॒ पन्था॑म॒न्वेत॑वा उ॑। अ॒पदे॒  
पादा॑ प्रति॒धात॑वेऽक॒रुता॑प॒व॒क्ता हृ॑द॒यावि॑ध॒श्चित्॑॥ श॒तं ते॑ रा॒जन्  
भि॒षजः॑ स॒हस्र॑मु॒र्वी ग॑म्भी॒रा सु॑म॒तिष्ठे॑ अस्तु। बा॒धस्व॑ द्वे॒षो नि॒र्ऋ॒तिं  
परा॑चैः कृतं चि॒देनः॑ प्र मु॒मुग्ध्य॑स्मत्॥ अ॒भि॒ष्टि॒तो व॑रु॒णस्य॑ पा॒शो-  
ऽग्ने॒रनी॑कम॒प आ वि॑वेश। अ॒पां न॑पात् प्र॒तिर॑क्ष॒न्नसु॑र्यं दमे॑दमे (४९)

स॒मि॒धं य॑क्ष्य॒ग्ने॥ प्र॒ति ते जि॒ह्वा घृ॑तमु॒च्च॑रण्ये॒त्समु॒द्रे ते॒  
हृ॒द॒यम॑प्स्व॒न्तः। सं त्वा॑ वि॒शन्त्वो॑ष॒धीरु॒ताऽऽपो॑ य॒ज्ञस्य॑ त्वा

यज्ञपते हविर्भिः॥ सूक्तवाके नमोवाके विधेमावभृथ निचङ्कुण  
निचेरुरसि निचङ्कुणाव देवैर्देवकृतमेनोऽयाडव मर्त्यैर्मर्त्यकृतमुरोरा  
नो देव रिषस्पाहि सुमित्रा न आप ओषधयः (५०)

सन्तु दुर्मित्रास्तस्मै भूयासुर्योऽस्मान् द्वेष्टि यं च वयं द्विष्मो  
देवीराप एष वो गर्भस्तं वः सुप्रीतः सुभृतमकर्म देवेषु नः सुकृतो  
ब्रूतात् प्रतियुतो वरुणस्य पाशः प्रत्यस्तो वरुणस्य पाश एधो-  
ऽस्येधिषीमहि समिदसि तेजोऽसि तेजो मयि धेह्यपो अन्वचारिषः  
रसेन समसृक्ष्महि। पयस्वाः अग्र आऽगमं तं मा सः सृज-  
वर्चसा॥ (५१)

दमेदम् ओषधय आ षट् च॥ [४५]

यस्त्वा हृदा कीरिणा मन्यमानोऽमर्त्यं मर्त्यो जोहवीमि।  
जातवेदो यशो अस्मासु धेहि प्रजाभिरग्रे अमृतत्वमश्याम्॥ यस्मै  
त्वः सुकृते जातवेद उ लोकमग्रे कृणवः स्योनम्। अश्विनः स  
पुत्रिणं वीरवन्तं गोमन्तः रयिं नशते स्वस्ति॥ त्वे सु पुत्र शवसो-  
ऽवृत्रन् कामकातयः। न त्वामिन्द्रातिं रिच्यते॥ उक्थउक्थे सोम-  
इन्द्र ममाद नीथेनीथे मघवानः (५२)

सुतासः। यदीः सुबाधः पितरं न पुत्राः संमानदक्षा अवसे  
हवन्ते॥ अग्रे रसेन तेजसा जातवेदो वि रौचसे। रक्षोहा-

ऽमीवचातनः॥ अ॒पो अन्व॑चारिष॒ः रसे॑न॒ सम॑सृक्ष्महि। पय॑स्वा॒  
अग्र॒ आऽग॑मं॒ तं मा॒ स॒ सृज॑ वर्च॑सा॥ वसु॑र्वसु॑पति॒रु॒हिक॑मस्य॑ग्रे  
विभा॑वसुः। स्याम॑ ते सुम॒तावपि॑॥ त्वाम॑ग्रे वसु॑पतिं॒ वसू॑नाम॒भि प्र  
म॑न्दे (५३)

अध्व॑रेषु॒ राज॑न्। त्वया॒ वाजं॑ वाज॒यन्तो॑ जयेमा॒भि ष्या॑म  
पृथ्॑सुती॒र्मर्त्या॑नाम्। त्वाम॑ग्रे वाज॒सात॑मं॒ विप्रा॑ वर्ध॑न्ति सुष्टु॑तम्।  
स नो॑ रास्व सु॒वीर्य॑म्॥ अ॒यं नो॑ अ॒ग्निर्व॑रिवः कृ॒णोत्व॑यं मृ॒धः  
पु॒र ए॑तु प्रभि॒न्दन्। अ॒यं शत्रू॑ञ्जयतु॒ जर्ह॑षाणो॒ऽयं वाजं॑ जयतु॒  
वाज॑सातौ॥ अ॒ग्निना॒ऽग्निः समि॑ध्यते क॒विर्गृ॑हप॒तिर्यु॑वा॥ ह॒व्य॒वाङ्  
जुह्वा॑स्यः॥ त्व॒ ह्य॑ग्रे अ॒ग्निना॒ विप्रो॒ विप्रे॑ण सन्ध॒सता॑। सखा॒  
सखा॑ समि॒ध्यसे॑॥ उद॑ग्रे शुच॑य॒स्तव॒ वि ज्योति॑षा॥ (५४)

मघ॑वानं मन्दे ह्य॑ग्रे चतु॑र्दश च॥ [४६]

This PDF was downloaded from <http://stotrasamhita.github.io>.

GitHub: <http://stotrasamhita.github.io> | <http://github.com/stotrasamhita>

Credits: <http://stotrasamhita.github.io/about/>